

LA SCJATULE SINODÂL

Une volte a comandavin i predis, stant che la glesie, par gole o par santescugne, e veve in man dut, cjapansi cussì onôrs e critichis.

Cumò une sane laicitât e domande che a seti la int, cu lis sôs istituzione legjtimis, a rangjâsi tal cjessi la sô storie. E la glesie e jè tornade, salacôr rabiosute e displasinte, a sintâsi come ducj, su la cjadree o par tiere. No plui su la sinte reâl Chest fat providenziâl j dà la possibilitât di metisi a pâr dai ultins e di jessi crodude cuanche e fevele, parceche no à plui nuje ce pierdi e duncje e jè plui libare.

Sinpri i tins, e àn puartât tal nestri mont un pluralisin culturâl, ideâl, politic e morâl, e partant l'onp di vuè nol sint dome la cjanpane de glesie, ma an sint ancje di âtris. Adiriture al rive a orientâsi cence cjanpanis, chei ch'a fasin une sielte difarente. Ma alore la glesie no à plui nuje ce dî? À di fâ sintî instes la sô vôs, ancje se no pô plui inponi rispjet e ubidiense?

O pensìn che la glesie, sint vôs di Diu e vôs dal onp, e veti sinpri alc ce dî.

E se ancje la sô vôs e riscje di restâ une vôs che e berle tal desert, no à di tasê mai, parceche e jè fate par berlâ: berlâj al onp e berlâ a pro dal onp, soledut di chel che nol pò alçâ la sô vôs. Stant che ogni istituzion umane e cor il riscjo di servisi dal onp inpen di servîlu, la glesie e à il dirit-dovê di jessi "sinpri indenant e sinpri cuintri" dal pecjât de istituzion, come ch'al à profetât P. P. Pasolini.

Ancje se i tins a son ganbiâz, la "culture" furlane e jè condanade a jessi cristiane, parceche aromai si è creât un leam masse profont e masse vitâl par podê distacâju un dal âtri. La nestre storie e jè storie di int cristiane; il nestri model culturâl al è un model inbonbât di princips cristians, magari staronzâz e sintûz dome a nivel di subcussiense.

Chest nus permet di dî che ancje in di di vuè la glesie e à une part di fonde tal judâ i furlans a fâ su la lôr cjase e, di parone diventade sierve, e reste sinpri une des vôs plui scoltadis. Al dipent di ce che e dîs e di cemût che lu dîs.

* * *

Dute cheste tabajade par jentrâ tal argument dal speli di chest mê: la Sinode, che la glesie di Udin e à finît ai 22 di mai di chest an. "Sinode" al ûl dî cjaminà insieme fra cristians, insieme cu la storie.

In cheste marce si à fevelât tant, si à cirût di fotografâ la realtât dal Friûl ch'al cjamine viers il 2000, par segnâj un troi, par dâj une man, par judâlu a no dismenteâ chei valôrs che lu àn tignût su fin cumò e che a riscjn di lâ pierdûz parceche al è masse cjapât dai siei problemis e masse bonbardât di modis e di modêi contraris.

La sinode no jè dome un fat eclesiâl. E jè ancje un fat sociâl, culturâl, politic. Soledut e devente une sperance e une fuarce par un popul e un pont di riferiment unic. A une cundizion: che la glesie a feveli a

non e insieme cun chei che no àn possibilitât di fâ sintî la lôr vôs, chei che, par comoditât, a son etichetâz come "ultins"; e ch'â disi chês robis fuartis e santis che a divegnin dal coragjo de professie.

Dopo cinc agns di grant cjararâ, di grant discori, di grande propagande sul gjornâl diocesan "la Vite Catolice", là che si diseve che dute la glesie di Udin a ere diventade un cantîr e che dutis lis comunitâz a erin inpegnadis fint al spâsin par parturî chest grant fat cumò o sin rivâz al moment de veretât

Finide la vore, o podìn viodi cui nestrîs vôi se e jè stade une bugade di professie o une surisute partudide de mont. Cualchidun al à fevelât de sinode come di une grande scjatule. Ducj e àn dit robonis di cheste scjatule. Ma esal possibil, esal lecit lâ a viodi ce ch'al è dentri? O esal un pecjât meti in dubit la propagande che dal lôr prodot e àn fat i prins interessâz?

Oltri che par sintût a dî e par chê percezion che si à girant par ca e par là e sintint la clime ch'â regne atôr pal nestri mont e lontan des sugestions de centrâl catolice, o vin volût sintî, dai tancj, tre vôs, un predi e doi laics, che tun mût plui o mancûl diret e àn vivude cheste lungje stagjon de glesie udinese. De lôr esperiense e jè saltade fûr une idee di sinode unevore plui prosaiche e mancûl epiche di chel che si lejeve tai "boletins di vuere" uficiâi.

Lis pecjs di fonde a son chestis:

- une robe masse lungje e partide cence cunvinzion de base, che le à patide plui che volude;
- une robe za confezionade prime di nassi, in mût che dutis lis vôs contrariis o difarentis a vignivin par ordin fatis cidinâ;
- une robe masse inteletuâl e messedade dai soliz cuatri esperz, di mût che la glesie fate di int senplice e cence diplomis, la int "normâl", si è cjatade come fûr de sô aghe e de sô clime, preferint tasê pluitost di riscjâ di dî robis che lis sintive ma che no rivave a dîlis;
- pocje e nissune sensibilitât e atenzion pes realtâz plui piçulis, pai paîs fûr di man, pe culture mancûl sunsurose ma no par chel mancûl grande, di mût che si è lâz indenant cun tune vision dal grant al piçul, dal centri `e periferie, dal studiât al no studiât, cun grande penalizazion dai piçui e dai ultins e in contradizion complete cul vanseli;
- pôc coragjo tes sieltis di fonde là che la societât no rive o no ûl rivâ, come il rispjet e la rivalutazion concrete des culturis e des lenghis minoritariis, in non di une "catolicitât" e di une uniformitât banâl e distudade; cussì chê che a ere une buine ocasion par che la glesie si riscatas tai confronz de sô int e par parà jù ducj i pecjâz di conivence cu la prepotence dal Stât e des istituzions e di omission di un so dovê precîs e jè lade pierdude, sielgint la cojarie e la diplomassie a scapit de professie;
- pocje disponibilitât a fâ strade cui onps, acetant ducj i riscjos di un cjaminâ in libertât, cu la possibilitât magari di rivâ a conclusions difarentis ma che a erin di ducj e plui aderentis `e realtât cussì la glesie e à pandût ancjemò une volte la sô ustinazion di no rinunciâ a

un so progjet par dâj valôr e spirt al progjet di vite che i onps a stan inmaneant cun tante fadie e contradizions;

- pocje e nissune autonomie tai confronz dal podê centrâl de glesie;
- la sielte precise di rinunciâ a jessi capide di ducj par no rinunciâ a un so lengac e vocabolari;
- il terôr di presentâsi cu lis sôs virtûz ma ancje cui siei difiez, come che e jè, cence trucs e cence belez; cussì si è indenant disint che dut al leve ben, che ducj a diventavin maz pe iniziative, che no si veve mai viodude une robone dal gjenar.

* * *

Cumò, cul non di Diu, dut al è finît. Dopo che il Vatican al varà coreizûz i conpiz dai cristians dal Friûl e che ur varà dit fin dulâ ch'a son libars di fâ une lôr strade (al bastares chest fat culî par sconsê di pierdi tinp a fevelâ di robis là che no si è libars di decidi nuje!), o varin di tacâ a meti in vore un progjet che nol è vôs e volontât gjenuine dal popul di Diu, che nol è il speli vêr de nestre realtât; so redut o varin in man un mieç masse sponpât e sglonfât par podê inludisi di fâ, parie, strade e storie.

In chê dì dal grant licôf, te fieste des Pentecostis, a conclusion di chest lunc cjaminâ ator ator il poç, il vescul di Udin al à volût, come ricuart, screà il grant altâr centrâl dal domo di Udin. Viodût di lontan, al semeave une robone e al faseve colp. Però chei che a erin dongje si son ingrisulâz cuanche e àn sintût un grant cricà di breis e si son metûz lis mans tai cjavêi cuanche, lant a tocjê i grancj scjalins di marmul paveât ch'a vevin di tignî su il dut e àn sintûz i grops dal len e si son intosseâz cu la puce de vernîs apene dade su. E chei che a crodin in tai spiêi, si son insegnâz cu la man çanpe.

La Patrie dal Friûl n° 7 – 8, lui – avost 1988